

浦二田尺牘

上海棋盤街
文瑞樓印行

不是集

金匱浦起龍二田著

書下

致施立亭

代王欽齋

城南晤語具知好古慕學之誠弟薄遊礪里于今三年主人晨夕相索每欲然自下意念深矣到館後以所言致之輒以不敢自信為辭適歸自滇南論定古文限為程課日有孜孜上自左國史漢下逮唐宋大家已脫藁成千六百紙矣明年將再易藁正須同學互參如有意相觀而善與於斯役實不朽盛業也率此佈復不具

與黃是式

承顧遽別歉然之甚寒壇本色如此知與大兒訂來春同伴入都之約但冷署介居省會承應煩多唯大兒稍有知識必得伴處半年庶免隕越且俟來秋再商行止此事勢使然非兒之負約也謹此佈悃

上同門梁相國薌林先生

昨歲旌麾遠貢兼傳年伯老大人尊諭齒及少陵拙筭折節下交虛懷采菲顧惟何人得荷斯寵及於旋旆正值負疴望拜河干彌增罪戾回憶甲午追陪年伯老大人蘇臺講藝心佩誨言越十餘年隨班子職而知分自屏南北遐遺詎望五雲尚叨慈覆茲者小兒某偕其研友瞻溯帝京至日即令摳衣叩見叩謝伏懇垂神噓植致之實錄之館供謄寫之役得秋試不廢而即次有資則所以大造於愚父子者二天未足為喻也肅此泐悃臨楮不勝悚切懇祈之至

致楊州府學周寅兄

水東良晤一紀于茲風雨河山予懷杼柚年老先生吾曹領袞維揚佳勝人文蔚興聞聲景慕者神馳廿四橋頭濤光月色助發清暉也弟德涼福淺曾除此席譬如海上三山船且至風引之而去家無儋石萬里滇雲飄然蓬轉承乏蘇臺勤勞淡泊藉以容身庶幾循分自効願舉示成式加諸訓詞茲有敝鄉盛君名卿之後貧薄無憊操術相人重趼養母嵇世叔輩引致梅花院長冀其濡沫誼未有適樂國而不躡崇階者非敢望脫粟授殮惟與院長諸

老左提而右挈之即已旣仁者之粟矣。蕪玉肅候。翹叩榮禧。統希丙照。不宣。
致常郡學博樸存胡年兄

連軫出都。遂踰十載。文旆戾止。未及操艇入郡。就請老年伯父崇高福履。修年家子之職。罪何可逃。但日聞鄉邑士友披春風沐化雨。揚於無異辭。為之加手於額。賴年長先生一張吾軍也。弟於十年之間。遭喪乞食。行止輒輒。不堪為知己道客。冬承乏蘇庠。密邇上憲。綆短汲深。彌用惴惴。其清況則彼此共之。不待言也。茲值郡試。囑舍弟率小孫淮音晉謁崇墀。額候榮祉。諸孫輩觀場者四人。淮音為長。粗知文理。奉撫憲取入書院。望先生加意提獎。感在五中。諒能心照也。臨池依溯。不任主臣。

致長洲明府馮公

種承面命。積奉手書。誣謗鄭重。懼不敢當。顧惟名邦分篆。弁冕東南。父臺老先生以麾絃清暇。考獻徵文。洵茂宰之盛心。政成之明效。當此郡乘局開。名賢薈萃。就便兼纂。實一大機會也。弟意于領局諸公中。專請一先生任之。差易即事。前已囑胡寅兄轉達矣。所有備考事宜。徐當條開遞照。但札諭云有

台銜一扣並未帶到。想函封遣發時偶遺之也。謹此附復順候宗禧。

致元和明府金公

屏跡蕭齋。拘文牽義。重蒙賜雨銘。戢不勝。日來細讀大令郎新課。才華英邁。一往跡弛之氣。超越之姿。正如千里霜蹄。不受羈勒。洵未易才。而弟癡直不語世故。每于鄙心蓄疑處。輒注一二商語。知老父臺虛己之懷。賢公子謙受之意。必不詫以為妄。而河漢其言。掌教牧園先生。喜接後進。倘有意來遊書院。定能相得益彰。弟已先致矣。率泐佈悃。不悉。

致寶山學洪寅兄

素心宗仰。辦香遙叩。時在春風座隅。弟累歲飢驅。行踪萬里。即如宗契濬發。輩經年不一二相見。然每見輒自謂出門有功。若老寅臺老先生。則師事其人。也。弟以是彌切溯回。客冬承乏郡庠。私喜從遊不遠。而帶水睽違。願復未遂。前日萬老長兄惠然戾止。手致訓辭。恍同良覲。譽及拙箋。深慚紕繆。新正走謁學憲。曾有墨選付梓之諭。歷今三月。並未發來。不審胡寅翁年長兄處。曾否領刻。都無音耗。承命之辱。無以應也。至末學疎陋。僥倖弋獲。聞中殘卷。

無一存者。重蒙搜覽。自顧朽然。益增悚汗。歲內不及科試。玉峯握手。當在明春。謹叩屬萬老。晉賀崇禧。并藉手附復。臨穎翹依不盡。

上開府陳榕門

八月二十八日恭接憲帖。自惟微末閒員。常蒙恩眷。殷殷記存。昌黎稱于公居連帥之尊。蓄不世之才。而與卑鄙庸陋相酬答。如響應。是誠千載一遇。於卑職得此何地。可容眉詮一書。重蒙賞給刻資。帑三年始告成事。迫欲寄呈。憲閱道遠。莫致適乘。今使附上墨印太史紙一部。謹已裝函。白綿紙一部。期促散帙。包束伏祈鑒納。凡有紕繆。并祈諭誨。紫陽書院仍是次山先生主席。來年大抵仍舊卑職。已致憲指命筆道謝。奉詢堪任山長。而肯膺遠聘者。意中惟有原任奉常海虞陶稚衷先生。名正靖。係與卑職同年。現館蘇州。蔣氏春閒送徒入京。非其志也。累有南來書。寄勇退之志。溢于言表。九月中決旋里矣。卑職懸揣大憲招致。定當應聘。所謂淵博有根柢。端重足為人師者。洵其人也。需其歸卑職。當與次山先生交口苦勸之。如果契合。亟再繕摺稟聞。葛黃諸先生順候。近履肅此稟申。須至稟者。

又

於六月中接到憲諭展誦之餘仰荷獎許過分所辦進呈書多糜重貲又蒙溫語假借寬其冒昧之愆感戴何極萃古齋書尚未銷訖謹道備紙之諭冬間可以商辦也

又

累奉憲帖下頒撫謙忘分獎借逾涯彌增悚惕稟者涑水傳家集梓工於二月杪竣事刷裝各工於三月杪竣事茲將版片書帙箱夾裝護點交蔣丞押繳憲轅伏候憲鑒茲集校刊頗極詳慎足稱全璧其中不無口眼順溜偶一差謬古今鋟版盡然諒或可幸無罪惟裝潢進呈書一件卑職初次辦理未諳事宜稟訓靡從尅期又緊時懔不純不備之虞因而問道已經若邵北涯何心友諸老宿並云寧敬謹有餘無疎略取戾遂爾切訪料工換集名手正在督辦十部間隨接憲諭須備二十部即又趁各工在局續辦齊全至三月廿八功已垂成矣復接脚子齋回憲飲進呈書不必過於華麗其後十部可以已之展誦之餘傍徨罔措奈成事難以復回謹將二十部全數繳呈以備

揀用。其半年以來一應工費并發。送繳存各書開具清數一本。備呈憲驗。舊刻傳家集四部。序文附錄年譜各底本及文獻通考二函并繳。至蒙憲賞書。貲又垂問。眉詮刻事。緣春閒併工專辦。憲項以故卑職登版書成。卷無多。容俟後刻成一種。陸續遞呈憲鑒。感戢冲營。五內交集。牧園先生生命筆附謝。謹此具稟。再進呈書內。憲序繕寫一遵來式。嗣又博訪前輩。恐須通幅低二格寫。以避雙擡字樣。今將承續備寫。照格二十副。續後進呈。

又

上年秋冬之間。兩奉憲諭。委擇掌教。屬意在柴桑公。而歲底忽復中止。某已經繕稟附聞。茲二月中。黃先生旋里。復接諭帖。知此稟未到。目下想可到矣。據黃先生口述。大人台指。陶倘不行。即轉延北崖邵老先生。北翁現掌蘇府志局。某晨夕把晤。謹即啣指敦請。而北翁頂謝憲恩。遙唁。隨云二十年來。患苦脾疾。舟車勞頓。不任遠行。再三言之。立意堅決。因復就商別請。又少愜當者。竊思延一山長。判年未有定局。逡巡不敢稟復。某自去冬病中。早決去官之志。今已得請歸田。黃先生一得此信。特地到齋。慇懃。某驚悚退避。續思未

學書生。舊蒙收錄。一紀於茲。其書院教席。應再妙選高明。而憲諭中提撕纂輯通考一事。或者以寬閒晚境。挈一知書兒子。依附大人鈴閣。勉副昔年成命。得遂掛名末簡。則誠宿世之幸。而不世之光也。眉詮再當覓便寄呈。肅此具稟。

又

伏自滇陽吳會。履厚戴高。幘幘在昔。前歲接待坐隅。溫顏撫問。作養下逮。孫兒加賜壽簾珍食。恩施稠疊。報稱未由。九月廿六日。有種德堂董事。蘇府學生員王汝楫。齎奉鈞批。并連名聘啟。到鄉延任本堂監會。某八旬重聽。揣勢固辭。而該生語諄意切。感動惻隱。素懷勉起承應。即以廿九日赴轅。稟叩憲駕。適巡淮右。因遂履閱堂事情。情形伏查此堂地介閭閻。胥衝滙積。多殍骸露棺。先是有原董事王某。置瘞壇殮具。勉行收卹。至乾隆五年。呈准前撫憲陳題免壇糧撥給廢宇。錫名開局。但某薄力苦支。別無存積。迄今先後繼董。伊族王大森。并汝楫等。又復有願無貲。閱視之下。敗屋空虛。俯仰無措。隨晤沈宗伯。具陳大憲。許題將通崇連界漲沙多頃。酌撥老婦普濟育嬰。種德永仁等。有底無底。四堂低昂充實。照例具題。用垂永久。仰見憲仁至公。至溥澤。遍貼

連朽枯即某所領一堂可不煩蒿目貲充事舉受成監核久之永遵曷勝
慶幸再某管見更有養節一項錫金兩邑現行蘇郡各堂未舉凡民間苦志
孤孀窘無存活者行令各該地方具結開報酌給月糧養成完節實于風化
有裨應否并將此條續編種德堂內一並聲奏垂為成法伏候憲奪為此繕
摺肅稟統祈憲鑒

與常熟明府畊山唐年兄

接武彤墀分襟廿載福星所指近在鄰封曷勝雀躍弟投老杜門家徒四壁
冬烘冒絮僕債維艱遣姪某叩賀崇祀舍姪某厥口習事周慎不欺年老先
生以子行畜之使供巾月之役稍可御冬拜恩厚矣弟父子伶俜寄生研北
縈紆瀆聽統具口陳情炎於中語無倫次春水一葉尚當親奉德音臨穎悚
切不任依馳

與震澤明府劉公

公所識韓合座飽德仰見老父臺岳峙淵渟普容蘿附而冷官飽繫繼此多
睽俄奉霞札如親台宇以盤錯紛繁之下留神學校今之明府罕覩其儔如

諭陳設宮懸以副稽古盛心。使乎遙返寸緘。附報藉候崇禧。不任翹切。

致邑侯王濟光

逕啓。撫憲准于廿四日出府。巡勘海塘。先是班傳來候主講。東已到而復以他事中止。并延飲亦不及矣。伏稔老父臺一片婆心。弟與主講再四揆情。莫妙于里紳弭釁。乃得行所無事。若在當道。似難法外主張。即東林助費。亦恐鴻爪留痕也。弟有別札。諄囑劍光矣。監價本色若干穀。懇一示時值的數。申懇不盡。

與華聲求

滄浪一晤。未罄鄙私。首宿寒齋。不能作窮主人。深用慚報。啓者。吾邑古名剎。自邑城以東。鵞湖以西。嵩山為冠國。初涖公大禪師奉章皇內召。賜還撥帑重興。今主席日公和尚。其嗣法曾孫也。修廢舉墜甲於一邑。邑先達皆極口首推之。茲將補所未備。造鐘樓一座。文室數間。須工料銀六百兩。吾邑好義而有力者。亦金昆為冠。以第一流善士結本鄉第一流善緣。令山左右諸姓皆在下風。豈非盛事。敦請到山一覽大局。當有快然樂就者。肅此代致。

與陳大成

種承嘉惠未展寸私茲有嵩山日和尚來蘇云乘此歲豐于九月中起手作鐘樓丈室得數大緣便可成功且以每分三十為度吾賢手創盛業里中親友人人欲納交恐後者賢昆當此倡一不朽勝緣將見人人尤俯躬頌義不特山中人而已率此先容不一

又

顏老畏寒擁敝裘若繭蛹誰復念及者忽奉雅餉高誼不敢孤敬嘗以拜有來無往口占陳釐偶句并祝熊祥明當書上窮秀才故態可發一噓也

與丹五弟

相距六十里相違三百日便似遙遙曠隔念吾弟過庭順旨家道隆隆益起尤足感發我故園心也啟者嵩山禪林吾鄉四五姓實主持之今主席者秉真實法發廣大願創建鐘樓丈室一振宏遠規模吾宗鼎立里中豈可讓義他族領袖斯舉非喬梓而誰各親友議叙十分每分三十金愚勉當一分矣吾弟幸力任一分值此豐歲踴躍讚嘆而為之為一鄉生色大快大快不他

及宗望

與惠文弟

吾宗後起如兩弟天性孝友肯為慈親種無量福田大難大難今於九月間嵩山興起鐘樓方丈是一件六七百金大緣實千載流傳之業兩弟於嵩山有種種宿緣茲再承一緣分倡集銀三十兩以襄善果則高堂之祿壽膝下羣英之鵲起與佛宇俱崇矣便聞來晤何如

與蔡思兼

令兄一出名世弟輩額手預賀而嵩山衲却束手自危謂將有鐘樓丈室之舉大護法獨當一面者今且高遠難攀矣弟解之曰不然有難弟可仗也其樂善之心勇義之力與大護法並駕齊驅吾為諸禪德保任之蓋日和尚來蘇問答之語如此茲為老長兄述其語渠意不過集里中數分每分三十兩為率貴宅東菴山衲自致外吾長兄必為擔任一分無使鄙言不酬是所顙望專泐佈意

與常熟明府陳

甫陟崇墀。便飲醇德。仁聲遠被。洋溢郡城。可勝額慶。有浦曹氏之子。浦三舍者。貧末寒宗。佃田自活。緣不協于田主。姚姓者。致將失業。皆其自取。可否一綫垂慈。憐其孤寡。全其故業。俾得免于老弱。轉徙此則。老父臺先生。法外之仁。恩同覆載者也。弟硯拙性成。非分之言。從不越俎。祇以四窮之戶。一本之推。不思避嫌。苦為饒舌。仰希台照。順叩崇禧。不宣。

與楊聖功

前擾邨尉。容當踵謝。茲有維揚孫君元廷。本舊家子。好為四方之遊。工偃師之術。而口技尤絕。敝郡當事。及薦紳並加青盼。今特欲晉謁貴處。士夫獻渾脫。瀏漓之藝。以博鼓掌。惟賢甥坦進之座右。試其擅長。并廣為游揚。俾遊興行囊兩不落寞。則推烏之愛。感佩者。不獨孫君之身受矣。率泐布瀆。附候崇祉。

上開府徐雨峯

今現呈繳刻樣六篇。并訂改常府屬文。謄本八篇。原稿八篇。伏候憲驗。前月二十六日。徵驗太倉州屬訂改諸篇。倘蒙鑒定。乞賜發下。以便付寫登板。

與蔡啟南

改月來欲就尊二房金昆面商一語。暑雨相屬行行且止。東兄為朱門懿親。朱有遺篋。棄不收卹。以累窮老戚屬。殊似礙理。此言唯懿親可緣以曲達。節近恐當入城。先此乞致。容即敦懇。并謝前誼。不備。

致葛搢笏

周行惠示。既隔同城。迢遞南州。更懸異地。杖屨縈懷。何時可釋。辨刊涑水遺編。自是老校書分內事。旁搜故策。几榻橫陳。判年寢處于斯。至是一弛負擔。但自冬杪。以暨春深。日盼歸颿。攤書就正。不可得。為惘惘爾。裝備進呈書。吳中名手。只有數人。能事居奇。大言高價。促辦添辦。鉅費多糜。獨此一節。中心維谷。略已稟達大人。維先生鑒照之。所贈十書。端陽後當以試事到仁里。手致世兄也。弟亦蒙賞如數。並希聲謝。拙詮鄙淺。不過兔園中物。書院同人。嗜痂庀梓。不圖謬承印可。兼邀大憲賜資。撫躬增慙。俟有成卷附政。張少兄抱疴。握晤稀簡。鄧梓與王梓。兩局互賽。終始可嘉。拙刻資淺。未得多人。看將來機會。是否遵教。強舍親間。居寂寂。未審可廁座隅。去冬小除。大世兄榮發。秉

燭枉顧恩。卒闕于繕候。茲乘將思兄之使。順賀崇祺。呂舍親不別。札乞道念。種荷覆露。感戢無涯。臨穎溯迴。專復不一。

上某公

庚戌春首。得望清光。秋杪南轅。遂及一紀。飢驅天末。還統舊羶。養拙蕭齋。馳思鈴閣。雲深日遠。披懷無由。手擷庭蔬。知分自屏。茲者兒子敬敷。依隨研友。惻惻入都。種族單寒。才質駑下。獨其墨守繩尺。頗能跬步不移。非敢逾涯。有所陳乞。緣已旅食。希就京闈。但外省諸生。例不得入。惟列名諸館。可與觀光。因念謄寫實錄。需人踐更。冀欲注名。循例趨事。伏祈老大人憐之恤之。曲遂私請。使得就便應試。即次無虞。則進退不致兩窮。而恩賜直同再造矣。有此敬謹繕稟。不勝悚切懇祈之至。須至稟者。

與邵學民

昨歲冬中。接展教玉。曲折懇到。紙長三四讀。不能釋手。吾賢游陟清華。不忘疎懶舊契。造詣愈深。卑牧愈甚。且感且慚。杜箋得陳鄴架。用代昕夕神交。慕兄奄逝。捧吟四詩。增我腹痛。凋卹世誼。更見古風。茲小兒某。孟浪入都。得其

研友作伴。而外省諸生。例不得與京試。計欲上名實錄館。供謄寫之役。一可得即次之資。一可遂觀場之志。仰惟高厚。推所以周旋。故誼者周旋小子。知必能左右之。使之必得。幸不躓于前途。愚父子均叨慈蔭也。蕪牋奉復。奉懇肅候崇禧不莊。

致同年楊維圃

癸冬拜別以後。薄遊天末。看雲萬里。旋閱除目。喜吾年臺先生。於同鄉同譜中。又先我一鞭。為之北望額手。弟依人留滯。亦聊以賓師餬口。然視年臺坐擁皋比。近在江天數百里間。其為心境佳惡。相距何啻逕庭。客冬旋里。于臘月初。泊采石。登太白樓。回眺清署。神栩栩欲飛也。啓者新正。晤涑翁秦六先生云。遇一安氏子。從姑熟歸。久在高齋侍書。其初蓋假他姓委身。率受畜養。顧念此子係舊家親故。因集有二金。急切附上。易取傳別。以還本宗。想吾年臺一悉此因。當亦快然樂應耳。弟亦安之自出。囑筆致語。顯望丙照千萬。千萬便聞。幸惠德音。曷所未逮。甚盛甚盛。祇候年兄年嫂榮禧。并世兄輩近業。

曷罄馳企。